

# Fuigia en tiara fictiva

Selim Oezgür expona ella galleria d'art alla staziun da Sumvitg/Cumpadials

■ (anr/sb) «Jeu less scappar dalla realitad – mo nua?», ei Selim Oezgür sedumandaus gia en sia affonza. Dapi lu fui el dètg savens en sia tiara, el marcau fictiv Xanti. Siu marcau, la historia da quel e ses habitonts expona igl artist da Winterthur aunc tochen il fevrer 2008 ella galleria d'art alla staziun da Sumvitg/Cumpadials. La sonda vargada han *Selim Oezgür* e *Hannes Schüle*, il curatur dalla galleria, envidau alla vernissascha. Enqualin ha dau sua-tientscha agl invit ed era *La Quotidiana* ha fatg ina cuorta viseta. Sche quei ch'ei exponiu alla staziun ei art ni buc lein nus denton schar su a mintgin da decider. Tgi ch'ei aviarts avunda po l'exposiziun denton inspirar, inspirar da schar cuorer la fantasia e fugir enqual mument dalla realitad. En mintga cass ha Selim Oezgür ina fantasia vasta ed igl ei reussiu ad el da scaffir la tiara fictiva Selim. Pil giuven da 20 onns ei quella sco in refugi. Ils plans dil marcau Xanti ein filigrans ed il



Selim Oezgür expona siu mund fictiv ella staziun da Sumvitg/Cumpadials.

FOTO S. BEARTH

giuven presenta bia detagls, lingias dil tram, baghetgs, vias e flums. Era ils habitonts da quei marcau mauncan buc ed els vivan ellas historias dil giuven fantast. Selim Oezgür viva a Winterthur, studegia a Turitg e lavura savens el Grischun.

«L'idea d'inventar tals munds fictivs ei naschida en mia combra ch'jeu stuevel parter cun miu frar», ha igl artist declarau. Mintgin dils frars havevi sia part dalla combra e gia baul hagi el entschiet a conquistar in stel dapli spazi cun inscennar uiaras fictivas. Conquistar l'entira combra savevi el buc e cul temps par'il mund fictiv d'esser daventaus ina part da Selim Oezgür. El marcau Xanti ha ei in palast nua ch'il parlament ei da casa. Tenor Oezgür habitavi el sez ina ga en quel, el fuvì numnadamein il retg da quella tiara. Perquei ch'el hagi fatg bia sbagls hagi el priu la pussonza a sesez e surdau al parlament. Xanti ha atgnas muneidas e mintga bancnota ei in dessegn da Selim Oezgür.